

Regulativ da scola pil consorzi da scola per las scolas primaras e la scoletta dallas vischnauncas da Vuorz ed Andiastr

Las denominaziuns da persunas, funcziuns e professiuns en quest reglament serefere-
schan en general ad omisduas schlatteinas, aschilunsch ch'ei seresulta buca enzatgei
auter ord il senn dil reglament.

Sebasond sigl art. 50 dalla lescha cantunala da scola dils 26.11.2000 relaian las vischnauncas
da Vuorz ed Andiastr il suandont regulativ da scola:

*Il "Consorzi da scola per las scolas primaras e la scoletta dalle vischnauncas da Vuorz ed Andiastr" vegn suandontamein numnaus
consorzi.*

I. Determinaziuns generalas

Art. 1

Tips da scola

Il consorzi meina ils suandonts tips da scola:

1. scoletta;
2. scola primara;
3. classas pintgas (integradas).

Art. 2

Obligaziun d'ir a scola

L'obligaziun d'ir a scola en la scola populara sedrezza tenor las
disposiziuns dalla legislaziun cantunala da scola.

Art. 3

Temps da scola

¹ Igl onn da scola entscheiva suenter las vacanzas da stad denter
miez uost e miez settember e cuoza 38 jamnas da scola effectivas.

² Ils termins per igl onn da scola e las vacanzas vegnan fixai dil
consorzi en coordinaziun cul cussegl dalla corporaziun da scola
Rueun e contuorn. Il temps da scola jamnil cumpeglia 5 gis.

Art. 4

Temps d'instrucziun

¹ Il cussegl da scola fixescha il temps d'instrucziun per gi tenor las
disposiziuns dalla legislaziun cantunala da scola.

² Il temps d'instrucziun per jamna inclusiv ils roms d'elecziun
sedrezza tenor las disposiziuns dalla legislaziun cantunala da scola.

Art. 5

Absenzas
a) motivs da perstgisa

La scola astga vegnir munchentada mo per motivs fetg urgents priu
ora in gi da "jocker" per scolar ed onn da scola. Igl emprend ed il
davos gi da scola san buca vegnir pri sco gi da "jocker".

¹ Sco motivs da perstgisa per absenzas valan cunzun:

1. malsogna ni accident dil scolar;
2. prighel da lavinias ni vias buca transiblas;
3. mort d'in confamigliar e sepultura da tierparents.

² Sch'in motiv da perstgisa ei avon maun, eis ei d'annunziar quei immediat alla persuna d'instrucziun cumpetenta.

³ En cass d'absenzas pervia da malsogna ni d'accident che surpassan tschun gis, sa la persuna d'instrucziun pretender in attest dil miedi, dils geniturs ni dil representant legal per mauns dil cussegl da scola.

⁴ Sch'ins sto munchentar l'instrucziun pervia d'in auter motiv ni pervia d'in motiv previsibel, sto la persuna d'instrucziun vegnir orientada ordavon da quei fatg. Autruisa sto l'absenza vegnir tractada sco assenza buca perstgisada.

⁵ Sche l'existenza d'in motiv da perstgisa vegn dubitada, decida il cussegl da scola definitivamein en caussa.

Art. 6

Absenzas
b) congedi

¹ Ei sa vegnir lubiu congedis entochen 15 gis per onn da scola.

² Damondas da congedi d'in gi san vegnir lubidas dalla persuna d'instrucziun, damondas da dus entochen treis gis dil president dil cussegl da scola e damondas da congedi da varga treis gis dil cussegl da scola.

³ Decisiuns davart damondas da congedis ein definitivitas.

⁴ Per conceder permissiuns da congedis pli liungs che 15 gis da scola ei igl uffeci per las scolas popularas e las scolettas cumpetents.

Art. 7

Instrucziun da religiun

Las baselgias naziunalas instrueschan sin lur cuosts ils affons en lur religiun. Las localitads da scola stattan ad ellas gratuitamein a disposiziun persuerter.

Art. 8

Attestat, promoziun

¹ Il scolast orientescha ils geniturs ni ils geniturs nutriders davart las prestaziuns, la diligenza e la demananza sociala dil scolar cun in discuors ed in attestat ni rapport a scret per semester. Ei la promoziun d'in scolar periclitada ni ein auters motivs pesonts avon maun, ha el l'obligaziun d'orientar ils geniturs a dretg temps en scret.

² L'emissiun dils attestats e la promoziun sedrezzan tenor las disposiziuns dalla legislaziun cantunala da scola.

II. Las personas d'instrucziun

Art. 9

Relaziun
d'engaschament

¹ Las personas d'instrucziun ein emploiai dil consorzi.

² La relaziun d'engaschament dallas personas d'instrucziun vegn fundada, observond la legislaziun cantunala respectiva, entras in contract da dretg public.

Art. 10

Occupaziun dubla

Occupaziuns dublas d'ina piazza da scolast san vegnir lubidas entras il cussegl da scola. Occupaziuns accessoricas permanentas, specialmein talas cun intent da gudogn, ston vegnir lubidas dil consorzi. Il consorzi lubescha quellas mo sch'igl adempliment dils duers e dallas incumbensas da scola tenor lescha cantunala da scola ein buca periclitadas.

Art. 11

Obligaziuns e duers

Il scolast ha d'ademplir cunscienziusamein tuttas obligaziuns adossadas ad el conform la legislaziun cantunala e communalala. El ha da vegnir suenter als camonds dallas autoritads dil consorzi. El ha era da tgirar il contact e la collaboraziun cun ils geniturs. El ha da liquidar cass levs da disciplina. El survigilescha ils scolars duront la pausa, sco era ils urdeins ed il material da scola.

III. Il cussegl scola**Art. 12**

Cumposiziun

L'administraziun e la survigilanza da tut las scolas dil consorzi ei caussa dil cussegl da scola che vegn elegius dallas radunonzas communalas.

Art. 13

Incumbensas e cumpetenzas

Il cussegl da scola procura che las leschas federalas, cantunalas e communalas da scola vegnien observadas. Incumbensas specialas ein:

1. eleger e relaschar scolasts, nominar substituents e forzas auxiliaras;
2. survigilar las scolas, schaffir in uorden da scola e procurar che quel vegni exequius;
3. concepir regulativs da scola per mauns dallas radunonzas communalas;
4. fixar l'entschatta e la fin digl onn da scola sco era igl uorden da vacanzas;
5. procurar per ils manteniments dils locals da scola, sco era per ils adattai mieds didactics en quels;
6. approbar ils uraris sin proposta dallas persunas d'instrucziun;
7. approbar occurenzas da scola e sportivas sco era jamnas da project;
8. organisar las visetas da scola duront igl onn da scola;
9. controllar ch'ils contacts denter geniturs e scolasts vegnan tgirai (gis da viseta, sera da geniturs);
10. organisar la promoziun linguistica d'affons da lungatg jester;
11. relaschar in uorden da promoziun tenor las directivas cantunalas;
12. reparter ils scolars en classas ed assegnar las classas allas persunas d'instrucziun;
13. decider davart l'assegnaziun d'affons cun impediments d'emprender en ina classa pintga integrada e davart la dimensiun dall'instrucziun;
14. far la proposta agl uffeci per secturs specialas da scola d'attribuir affons cun talents specialas ni affons fetg talentai ad ina classa pintga integrada resp. d'ordinar mesiras da promoziun specialas per els;
15. organisar en cass l'integraziun d'affons cun impediments el sistem grischun da scola e da scoletta;
16. organisar las mesiras pedagogic-terapeuticas disponidas digl uffeci per secturs specialas da scola;

17. nominar il miedi da scola ed il dentist da scola ed organisar il survetsch da miedi e da dentist;
18. dispensar personas d'instrucziun per conferenzas, cuors, hospitaziuns d'instrucziun, collaboraziun en cumissiuns da scola ed en gruppas da lavur per activitads ordeifer il survetsch da scola. Congedis entochen dus dis conceda il president dil cussegl da scola, per congedis pli liungs ei il cussegl da scola responsabels;
19. relaschar in uorden disciplinar;
20. reglar ils cass penals tenor la procedura penala (procedura penala d'affons) sco era punir absenzas da scola. Castigiar ils culpeivels denter ils scolars en la rama dallas perscripziuns federalas e cantunalas;
21. tractar recuors e reclamaziuns enviars ils scolasts;
22. proponer alla suprastanza communal il preventiv per l'acquisiziun da mieds e da material d'instrucziun. Il cussegl da scola sa tractar en atgna cumpetenzza acquisiziuns singularas entochen la summa da frs. 5'000.- ad onn;
23. organisar il transport dils scolars;
24. surdar cumpetenzas e duers ch'ein, tenor legislaziun cantunala da scola, caussa dil cussegl da scola, ad organs specials da scola e relaschar reglaments corrispundents;
25. frequentar cuors digl inspectorat da scola Surselva;
26. allas sesidas dil cussegl da scola san las personas d'instrucziun ni in representant dallas personas d'instrucziun vegnir envidadas cun vusch consultativa. Davart las tractandas eis ei da scriver in protocol.

Art. 14

Cumpetenzza da decider

Il cussegl da scola ei cumpetents da decider, sche silmeins quater commembers ein presents.

Art. 15

Exclusiun

Scolaras e scolars ch'engrevegieschan permanentamein l'instrucziun ni il clima d'instrucziun e quei malgrad ch'els ein vegni admoni ed ils autorisai d'educar ein vegni orientai, san vegnir sclaus dall'instrucziun sin fundament d'in rapport a scret digl inspectorat da scola cumpetent dil survetsch psicologic da scola ed avisond la cumissiun tutelara.

Art. 16

President dil cussegl da scola

¹ Il president dil cussegl da scola ha specialmein ils suandontas duers e las suandontas cumpetenzas:

1. representar il cussegl da scola anoviars;
2. survigilar:
 - a) all'entschatta digl onn da scola la repartiziun dallas classas tenor ils conclus dil cussegl da scola;
 - b) igl entir menaschi da scola, specialmein l'observaziun digl urari e dil temps d'instrucziun;
3. menar l'inquisiziun en cass disciplinars;
4. preparar las tractandas per las sesidas dil cussegl da scola e procurar per la realisaziun dils conclus.

² En cass urgents pren il president dil cussegl da scola las mesiras necessarias che crodan ella cumpetenzza dil cussegl da scola. Tenor pusseivladad decida il cussegl da scola definitivamein en caussa en sia proxima sesida.

IV. Dretg da recuors

Art. 17

Reclamaziuns e recuors encunter persunas d'instrucziun ein per regla d'inoltrar en scret al cussegl da scola.

Reclamaziuns/recuors
encunter persunas
d'instrucziun

Art. 18

Recuors encunter disposiziuns partenent promoziun ni buca promoziun ein d'inoltrar enteifer 15 gis agl inspectorat da scola cumpetent e quel sto decider en caussa suenter haver consultau il cussegl da scola. Encunter la decisiun digl inspectorat da scola sa vegnir appellau al departement d'educaziun, cultura e protecziun digl ambient dil cantun Grischun enteifer 15 gis.

Recuors
a) decisiuns da promo-
ziun resp. da buca
promoziun

Art. 19

Encunter disposiziuns dil president dil cussegl da scola san las persunas directamein pertuccadas far recuors en scret al cussegl da scola enteifer 15 gis dapi la communicaziun.

b) Decisiuns dil
president dil cussegl
da scola

Art. 20

Encunter decisiuns e disposiziuns dil cussegl da scola en fatgs da scola san las persunas directamein pertuccadas far recuors en scret al departement d'educaziun, cultura e protecziun digl ambient enteifer 15 gis dapi la communicaziun, aschilunsch che la legislaziun cantunala e communal determinescha buca enzatgei auter.

c) Decisiuns dil
cussegl da scola

Art. 21

Encunter decisiuns penals dil cussegl da scola sa il representant legal ni il procuratur per giuvenils recuorer tenor art. 213 digl uorden cantunal processual en scret tier la giunta dalla dertgira districtuala cumpetenta sco dertgira da giuvenils enteifer 20 gis dapi la communicaziun.

d) Decisiuns ella
procedura penala
d'affons

V. Determinaziuns finalas

Art. 22

Quest uorden passa en vigur cun l'approbaziun dalla radunonza communal da Vuorz dils 25.04.2003 e dalla radunonza communal d'Andiast dils 23.05.2003 sco era cun l'approbaziun entras il departement d'educaziun, cultura e protecziun digl ambient dil cantun Grischun. El remplazza ils vegls regulativs da scola.

Entrada en vigur

Per las vischnauncas politicas:

Il president communal Vuorz:

Il canzlist communal Vuorz:

Il president communal Andiastr:

Il canzlist communal Andiastr:

Per il cussegl da scola Vuorz / Andiastr:

Il / la president/a:

Igl / l'actuar/a:
